

«ԿՐԹՈՒԹՅԱՆ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆ-  
ՔՈՒՄ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ ՀԱՆՐԱ-  
ՊԵՏՈՒԹՅԱՆ ՕՐԵՆՔԻ ՆԱԽԱԳԾԻ (Պ-250-13.08.2019-ԳԿ-011/0)  
ՎԵՐԱԲԵՐՅԱԼ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ  
ԱՌԱՋԱՐԿՈՒԹՅՈՒՆԸ

Օրենքի նախագծով առաջարկվում է *оптимально* բարձրացնել պետական նախնա-  
կան մասնագիտական (արհեստագործական), միջին և բարձրագույն մասնագիտական  
ուսումնական հաստատությունների սովորողներին պետության կողմից տրամադրվող  
կրթաթոշակների չափերը՝ բարձր առաջադիմությամբ սովորողների համար սահմանելով  
20000 դրամ, իսկ գերազանց առաջադիմությամբ սովորողների համար՝ 30000 դրամ:

Հարկ ենք համարում տեղեկացնել, որ Հայաստանի Հանրապետության կրթության,  
գիտության, մշակույթի և սպորտի նախարարությունը (այսուհետ՝ նախարարություն) մշակել  
և շրջանառում է «Բարձրագույն կրթության և գիտության մասին» Հայաստանի Հանրա-  
պետության օրենքի նախագիծը, որով նախատեսվում է իրականացնել արմատական փոփո-  
խություններ՝ կապված բուհերի ուսանողներին հատկացվող ֆինանսական աջակցության  
նոր սկզբունքների և մոտեցումների ներդրման հետ: Նախարարությունը նախաձեռնել է  
համապատասխան փոփոխություններ կատարել նաև «Կրթության մասին» ու «Նախնա-  
կան մասնագիտական (արհեստագործական) և միջին մասնագիտական կրթության մասին»  
Հայաստանի Հանրապետության օրենքներում, որոնցով կնախատեսվեն նախնական մաս-  
նագիտական (արհեստագործական) և միջին մասնագիտական կրթական ծրագրեր իրա-  
կանացնող ուսումնական հաստատությունների ուսանողներին պետական կրթաթոշակի  
տրամադրման նոր մոտեցումներ և մեխանիզմներ:

Նշենք նաև, որ Հայաստանի Հանրապետության 2019 թվականի պետական բյու-  
ջեով նախնական մասնագիտական (արհեստագործական), միջին և բարձրագույն մասնա-  
գիտական ուսումնական հաստատություններում սովորողների կրթաթոշակի ֆոնդը կազ-  
մում է մոտավորապես 1.7 միլիարդ դրամ:

Ներկայումս գործող Հայաստանի Հանրապետության վարչապետի 1999 թվականի ապրիլի 14-ի N 217-Ն որոշման համաձայն՝ Հայաստանի Հանրապետության պետական բարձրագույն և միջնակարգ մասնագիտական ուսումնական հաստատությունների (այդ թվում՝ քոլեջների), մասնագիտական-տեխնիկական ուսումնարանների պետական պատվերով սովորող ուսանողների համար սահմանված է կրթաթոշակ՝ նվազագույնը 4.650 դրամից մինչև առավելագույնը 6.300 դրամի սահմաններում: Այսինքն՝ նշված օրենսդրական փոփոխության արդյունքում ծրագրի գծով նախատեսվում է ծախսի ավելացում՝ մոտավորապես 6 անգամ:

Անհրաժեշտ է նշել, որ պարզ չէ, թե ինչ հիմնավորումից ելնելով են հաշվարկվել Հայաստանի Հանրապետության Ազգային ժողովի պատգամավորի կողմից նշված կրթաթոշակների չափերը:

Պետք է հաշվի առնել նաև, որ «Հայաստանի Հանրապետության հաշմանդամների սոցիալական պաշտպանության մասին» և «Առանց ծնողական խնամքի մնացած երեխաների սոցիալական պաշտպանության մասին» Հայաստանի Հանրապետության օրենքների համաձայն՝ հաշմանդամություն ունեցող անձանց և առանց ծնողական խնամքի մնացած երեխաների համար ևս սահմանված են կրթաթոշակներ: Հետևաբար, նպատակահարմար չենք համարում օրենքի նախագծով առաջարկվող կարգավորումը, քանի որ անհրաժեշտ է միանման մոտեցում ցուցաբերել կրթաթոշակ ստացող բոլոր արտոնյալ խմբերի նկատմամբ:

Պետական նախնական մասնագիտական (արհեստագործական), միջին և բարձրագույն մասնագիտական ուսումնական հաստատությունների սովորողների կրթաթոշակների չափերն օրենքով սահմանելու՝ օրենքի նախագծով նախատեսված մոտեցումը կարող է խնդրահարույց լինել հետագայում կրթաթոշակների չափերի փոփոխության դեպքում՝ օրենքում համապատասխան փոփոխություններ կատարելիս, մասնավորապես, հաշվի առնելով օրենքի ընդունման ընթացակարգերը, այդ թվում՝ ժամկետները: